

**MEMORANDUM O RAZUMIJEVANJU**  
**IZMEĐU**  
**DRŽAVNE AGENCIJE ZA ISTRAGE I ZAŠTITU (“SIPA”)**  
**I**  
**TUŽILAŠTVA BOSNE I HERCEGOVINE (“TUŽILAŠTVO ”)**  
**(U DALJEM TEKSTU: “POTPISNICI”)**  
**O**  
**SARADNJI U OBLASTI KRIVIČNIH ISTRAGA TEŠKIH POVREDA**  
**MEĐUNARODNOG HUMANITARNOG PRAVA**

**Svjesni** važnosti da Tužilaštvo Bosne i Hercegovine vodi efikasne krivične istrage u cilju efikasnog krivičnog gonjenja počilaca teških povreda međunarodnog humanitarnog prava;

**Svjesni** uloge Državne Agencije za istrage i zaštitu u vođenju krivičnih istraga u cilju efikasnog krivičnog gonjenja počilaca teških povreda međunarodnog humanitarnog prava;

**Svjesni** opšte obaveze za istraživanjem teških povreda međunarodnog humanitarnog prava počinjenih tokom oružanog sukoba u Bosni i Hercegovini u periodu od 1992. do 1995. godine i odgovarajuće zakonske obaveze organa vlasti u Bosni i Hercegovini da istražuju takve teške povrede;

**Svjesni** pozitivnog uticaja koje će takvo efikasno krivično gonjenje počilaca teških povreda međunarodnog humanitarnog prava imati na pomirenje u zemlji;

**U želji za** uspostavljanjem efikasnog sistema za podršku krivičnim istragama putem zajedničke saradnje u tim oblastima;

**Imajući u vidu** odredbe Zakona o krivičnom postupku Bosne i Hercegovine, Krivičnog zakona Bosne i Hercegovine, Zakona o Državnoj agenciji za istrage i zaštitu i Uputstva o profesionalnim osnovama za saradnju između Državne agencije za istrage i zaštitu i Tužilaštva Bosne i Hercegovine u otkrivanju i krivičnom gonjenju počilaca krivičnih djela,

**Potpisnici su dogovorili sljedeće:**

**Član 1.**

Potpisnici će sarađivati u oblasti krivičnih istraga o povredama međunarodnog humanitarnog prava na obostranu korist i u skladu sa odredbama ovog Memoranduma o razumijevanju (Memorandum), Zakona o krivičnom postupku Bosne i Hercegovine, Zakona o Državnoj agenciji za istrage i zaštitu, Uputstva o profesionalnim osnovama za saradnju između Državne agencije za istrage i zaštitu i Tužilaštva Bosne i Hercegovine u otkrivanju i krivičnom gonjenju počilaca krivičnih djela uz poštivanje međunarodnih sporazuma i odgovarajućeg domaćeg zakonodavstva.

## **Član 2.**

(1) Zajednička saradnja potpisnika uključuje, ali nije ograničena na razvitak zajedničke strategije, metodologije i operativnog plana sprovođenja krivičnih istraga o teškim povredama međunarodnog humanitarnog prava.

(2) Centar za istraživanje ratnih zločina i krivičnih djela kažnjivih po međunarodnom ratnom i humanitarnom pravu (u daljem tekstu: Centar za istraživanje ratnih zločina SIPA-e) za početak će delegirati pet (5) istražitelja za vođenje istraga o teškim povredama međunarodnog humanitarnog prava, u skladu sa odredbama Zakona o krivičnom postupku Bosne i Hercegovine, Zakona o Državnoj agenciji za istrage i zaštitu i Uputstva o profesionalnim osnovama za saradnju između Državne agencije za istrage i zaštitu i Tužilaštva Bosne i Hercegovine u otkrivanju i krivičnom gonjenju počilaca krivičnih djela pod direktnim nadzorom i po uputstvima tužioca Tužilaštva Bosne i Hercegovine (u daljem tekstu: glavni tužilac). U dogovoru sa glavnim tužiocem Centar za istraživanje ratnih zločina SIPA-e delegirat će po potrebi dodatne istražitelje, zavisno od raspoloživosti sredstava, kancelarijskog prostora i osoblja.

(3) Posebno odjeljenje za ratne zločine Tužilaštva (u daljem tekstu: Posebno odjeljenje za ratne zločine) pomoći će u koordinaciji aktivnosti krivičnih istraga između Tužilaštva i Centra za istraživanje ratnih zločina SIPA-e.

(4) Posebno odjeljenje za ratne zločine obezbjedit će, po potrebi, neophodna tehnička i druga sredstva za delegirane istražitelje iz Centra za istraživanje ratnih zločina SIPA-e kako bi im omogućili efikasno vođenje krivičnih istraga o teškim povredama međunarodnog humanitarnog prava. Istražitelji Centra za istraživanje ratnih zločina SIPA-e odgovorni su za svoj rad Državnoj agenciji za istrage i zaštitu, pod nadzorom i uputama tužioca.

## **Član 3.**

Sa danom potpisivanja ovog Memoranduma Posebno odjeljenje za ratne zločine obezbjedit će uslove za rad za pet (5) delegiranih istražitelja iz Centra za istraživanje ratnih zločina SIPA-e u prostorijama Odjeljenja, te neophodnog namještaja, računara i telefonske opreme za pet (5) delegiranih istražitelja iz Centra za istraživanje ratnih zločina SIPA-e.

## **Član 4.**

Tužilaštvo će pružiti sve druge vidove saradnje prema dogovoru potpisnika, uključujući i omogućavanje redovnih sastanaka potpisnika

## **Član 5.**

Zajedničke aktivnosti po ovom Memorandumu zavisit će od raspoloživosti sredstava, kancelarijskog prostora i osoblja koji rade na krivičnim istragama.

## **Član 6.**

U smislu ovog Memoranduma, potpisnici će se međusobno konsultovati o svim pitanjima vezanim za zajedničke aktivnosti koja se mogu pojaviti u tumačenju i primjeni ovog Memoranduma.

## **Član 7.**

Ovaj Memorandum stupa na snagu kada ga potpišu oba potpisnika i ostaje na snazi dok bilo koji potpisnik ne zatraži njegovo okončanje.

Ovaj Memorandum napravljen je u četiri primjerka, od kojih svaka strana zadržava po dva.

U Sarajevu, dana 12.10.2005. godine.

**Marinko Jurčević**

Glavni tužilac  
Tužilaštva-Tužiteljstva  
Bosne i Hercegovine

**Sredoje Nović**

Direktor  
Državne agencije za istrage i zaštitu